

顏氏家藏尺牘

附
考姓

一



顏氏家藏尺牘

附姓氏考

(一)

顏光敏輯

顏氏家藏尺牘序

鱗鴻雅藻。自昔延芬。溯厥源流。或以書法傳。或以文字著。傳書法者。肇鍾元常。而極於二王。著文字者。昉李少卿。而盛於六朝。歷今二千年。世俗競尙。有選本。有專集。有駢儷。有散體。各臻超妙。如度木鄧林。販糴江市。美不勝收。此曲阜顏氏未信堂所藏尺牘。裝池凡三十四冊。題跋一冊。姓氏攷二冊。皆一時名卿碩彥。英詞妙墨之所薈萃。蓋以書法傳者也。余藏之海珊山館。歷有年所。將持以贈友人。爰錄其全文。都爲四卷。附姓氏攷一卷。彙入叢書。以備一種。是向以書法傳者。今又以文字著矣。集內計二百餘人。當其含毫飛翰。結想停雲。或經緯文明。或商榷今古。或情致委婉。或寄託遙深。或旋斡而爲功。或剖析以見義。或挾張乎風月。或舒嘯乎煙霞。窺一時交際之隆。覘四海人文之盛。於以曠晤前賢。旁參故實。疏淪靈性。襲軒逸情。亦開卷之一助也。至諸公事迹。見於姓氏攷。哀輯始末。詳於題詞。披覽足悉。毋重贅焉。

道光二十七年歲次丁未春正穀日潘仕成謹識

顏氏家藏尺牘卷一

馮太傅溥

前承大翰。已有小札奉復。想久塵記室矣。不佞以耄年久病。復荷簡命。謬主文闈。惟恐隕越無當。以貽知己差。幸榜發之後。論無異同。差道罪戾。獨失之於令弟。以是爲愧耳。所恃高明。諒之於形跡之外也。屢煩注念。裁答稽遲。以無人索回字。且值不佞匆冗無暇晷。更衰老忘事也。惟照不一。賤名另具。

遠承芳訊。足紉不忘。兼領大杯之惠。謝謝衰病相仍。未能脫離塵鞅。日望銍車至止。從吉在何時耶。近吳逆已亡。休甲有日。且海內人文。雲蒸霞蔚。鱗集京師。眞千古盛事。惟祈台駕速發。馳驅王路。共襄太平耳。冗次率復。不盡欲言。

龔尙書鼎孳

奉別經年。圖晤不遠。茲偶值程舍親回里。取道金陵。喜得藉爲鱗鴻。以通芳訊。故趑然而治一函。舍親誼在水乳。倘蒙進而教之。弟與有榮施矣。馮池主臣名單具。

曹侍郎溶

歸讀大集。沉雄傑出。直欲囊括千古。壓倒時才。小巫爲之心悸。然疲懦有所激發。亦將力索枯槁。仰繪日月也。里人范成間。從弟至此。書畫十數種。足充清玩。其人樸實無文。以法鑒定價值。當奉教惟謹耳。餘留

面罄。

近代史書邸鈔之外。以必家乘爲憑。昨誦雄文。甚爲忠烈生敬。完上附謝。弟浴頓首。

葉尙書方藹

終年碌碌。未獲時候。孝履忽辱大教。注念殷殷。媿荷交并。曷可言喻。拙文鄙儻無似。深懼上玷名賢。有負仁人孝子之託。乃蒙不棄。採而用之。益不勝其悚仄也。使旋匆匆。率勒奉復。伏惟垂鑒。不一。

比承老先生來訊。審知孝履安善。甚慰。委撰先公墓表。久不報命。非敢忘也。懼一時草率。無以副仁孝之意也。旣又思之。世之有可言者。必待乎能言。而能言者。尤必得夫可言者爲之言。然後其言信。夫所謂能言者。非獨學問之博。而文詞之美也。惟其是非好惡。一本人心之公。而不徇時俗爲去取爾。藹之學問荒矣。文詞陋矣。獨其經經之鄙。不敢背公道。而輕徇時俗。則幸自反而無愧焉。然能言之人。不常有。而可言之事。又不常遇。生平讀書。見古人忠孝大節。必爲咨嗟涕洟。稱道誦說。況同吾世有至行卓卓。如先公者。又辱其後人不棄。命操筆記其事。豈非踴躍恐後者哉。竊有一言。不敢不奉陳者。昔年河間之破。實因王師再入關。而行述中。但云畿南亂而已。竟不言其亂爲何。則使後之傳忠孝獨行者。何所據以成信史也。從來兩國兵爭。仁人志士。舍生殉義者何限。前朝之節烈。獨非本朝之深嘉尙者乎。亦何所諱也。輒以鄙見。撫實書之。謹錄藹一通寄上。至於識慮淺闇。詞不稱意。有負所委。忸怩亦何可云。伏惟垂鑒。不宜。藹再頓首。

高侍郎辛允

承垂注已佩德矣。此謝諸凡幸自愛婆心。區區不盡。

劉參議思敬

昨晉拜時。遇一舍親。泊河之干。未防船滑落水。衣履盡濡。是以踵門弗便面晤。深以爲歉。舊日筆墨所記。偶相知者。刊一種奉公暇寓目。尙未印行也。有未當并希商示。以正其訛。至感容再面悉。名單肅。

劉考功體仁

使車駐山水之勝。勝友必多。朝夕得佳句。所獲已侈。不必更問阿堵矣。弟汗漫江南。自春抵冬。今始返棹。邗溝。然不敢入石門一步者。恐客多無以應也。耑价代躬走賀。兼有特誼之懇。春初在江甯。物色得一二。人。尙可供書卷旁頤指。今欲北歸。勢不能緩。而力又不足。倘老年親翁。假以一數。吾事豈不大濟已乎。密之。不須向人道也。明歲二月。當再晤以悉。弟昨在吳門。乃聞孔親家至舍。而弟失候。至今耿耿。近況。各何如。幸示爲慰。弟吳江一路。頗有所作。匆匆不及繕寫。容他日請正。

阮亭冒雨見過。念吾脩來當共談。幸惠然卽至爲望。脩來先生。小弟體仁頓首。

沈侍郎荃

金馬追隨。渥承雅眷。晤教未久。頓易星霜。伏諗兩年翁。秉濬沖之至性。篤莪蓼之深情。雖備極哀榮。而依然孺慕。弟以塵韁碌碌。未遑耑泐蕪緘。一慰孝履懷耿之切。與日俱長。茲敬捧瑤華。兼拜隆誼。仰惟摯愛。

不敢言辭。大老先生。穹碑題字。謹如來式。盥手以書。丙舍題額。亦率塗附。交來使矣。但中間款項。或有未妥。并立石年月。或秋或冬。未奉確示。另備數字。屆期酌配。何如。匆匆布復。並謝至意。憑楮神馳。弟荃再頓首。

昨逐隊而行。未免困頓。一應交際之事。尙覺疲苦。以故咫尺衡宇。而猶未敢趨叩也。舍親咨文已送到。聞旦晚尙須題請。不識何時可以咨入成均也。伏懇留神。統俟面時。九頓不盡。

聞咨送之文。昨已用印。感荷至誼。曷有極也。薄牒一緘。聊爲尊侔煙資。并照不盡。

所事聞農部已咨發貴衙門矣。闌期在即。顯望台慈。多方囑護。早賜允咨。感不獨舍親一人也。諸容面頌。弟荃頓首。

茹凡所託。承老年翁台諭。卽欲爲之作札。所有委折。竟爾忘却。望再詳示之。不一。弟荃頓首上。

虛火上攻。頭面作腫。卽靜臥尙不能支。況有筆墨事。紛紛未了乎。悶極悶極。顏年翁七律。高華秀朗。正如瑤臺嬋娟。見者皆知其妙。不止格律之精當也。二札已題。率復先君子崇祀。欲求顏年翁佳作增重。不審可許我否。門年家弟荃頓。

奉別未幾。頓移時序。還老入都。不識曾道及否。弟輩黽勉從事。幸已告竣。所拔者。皆潛處力學。單寒孤苦之士。想老年臺早已悉其大略矣。今因解差之便。遣奴入北。總仗留神照庇。目下尙有正事未竣。來月初當返敝鄉。長至前卽束裝。歲底可握晤。以罄積懷也。憑楮切禱。來僕甚蠢。諸凡望爲周全。切祝切祝。貴房

師佺老。此時想亦未回。回時并致意。外附闌墨拾冊奉覽。
鑾坡奉別之後。復感寒伏枕。駕過失迂。委冊亦稽報命爲罪。茲端倅上繳。乞賜察收。聞大集已付剞劂。何時得惠教也。附訊不一。弟荃載頓首。

繆侍講形

瓜步道中。過承惠恤。故人之誼。令人銘刻。歸來忽忽三年。不及以尺素候問起居。殊深懷想。令叔岳孔先生。遠臨敝里。得接手教。知近履佳勝。承台委。竟作子虛。人情薄於秋雲。而令親不無金盡裘敝之歎。在弟處。那移貳拾餘金。稍資行李。然而困頓極矣。瀕行草此。數行奉復。臨楮翹企。
好雨生涼。儘堪劇飲。明日候車騎早過。千祈攜綠綺來。一踐疇昔之約。兼可爲弟驅病魔也。望望。弟彤頓首。

承諸位年兄盛意。至再敢不祇領。惟日內炎風正暑。斗室促坐。無可爲樂。略微娛雨新涼。當以浮瓜邀快談也。率此容面罄。弟彤頓首。
一飯草草。甚以不得罄歡爲悵。尊分萬不敢當。併祈一一致之。諸年兄鄙衷。昨已面吐。幸有以諒之也。率此不一。

伏枕偶得二詩。書呈大方鄣正。輿會必佳。得賜和教。尤感也。修老年兄。弟彤又言。
昨候起居。不得面侍。色笑爲快。卷在何日解科。望年兄敕使一諭經承。恐駕回則于君卽謝事。又需有待。

也。特此再瀆。專候明示。弟心肅。

昨承賜顧。未獲趨謝爲罪。新選同人。向有公酌。不知近尙舉行否。如無。則年兄必有專席。弟以欲附贊合。行。未識可否。望示下。諸不一。

梁師伯於廿四日行。有啓即可附去。同人公候。甚爲切當。祈年兄卽作一稿。付弟謄寫。與來价可也。弟連日賤體病極。非敢於方命耳。率復脩老年兄大人。小弟彤頓首。

弟因歲事。倉皇拮据。略無寧晷。實不能操管作駢句。轉懇一友捉刀。以應臺命。苦不能工。惟年兄名手。點易用之可也。率復不一。修翁年長兄。弟彤頓首。

弟有許語。欲奉商榷。特走候。不得一晤爲耿。過三日。當再圖過訪也。弟移寓在東首打磨廠。眞君廟對門。夏舍親相隔十里。會面爲艱。奈何奈何。年兄諸凡行止。有便幸以尺一示弟。千懇千懇。修老年厚兄。弟彤啓頓首。

刻下在此候一回信。不得走高軒。約在明午後趨教也。特此先覆。弟彤啓頓首。

度歲碌碌無停晷。不得走晤爲快。尊章遲閣良久。可勝罪歉。值此心緒匆忙。勉就一面。請教。餘俟春明。一補過。堂聯書梁夫子句。想定有當尊意也。脩老年兄。弟彤啓頓首。

徐尙書乾學

久疎教言。時切瞻企。偶於啓奏時。一晤芝宇。又勿獲暢談。乃朝夕鹿鹿。良覲頗稀。悵歎曷極。茲有至親姓

名仰懇知屬瑣瑣可鄙。然有不得不爲轉煩之苦。情輒敢恃愛奉瀆。伏望俯俞。具感高誼。倘老世翁未能全允。或將其一轉托貴同人。必期有當爲禱。湖上隆情。尙未奉報。至今耿耿。然中心藏之。無日敢忘也。原欲走叩面懇。恐不相值。揣此布瀆。臨啓虔悚。

前慢甚爲歉。舍弟咨照已領入。特囑致謝。忠義卷目并四書解四種。奉上。諸容叩悉。不具。侍乾學頓首。

郝尙書惟訥

曩獲朝夕聆教。幸寡愆尤。別後典型日遠。莅事維煩。以庸拙之夫。處艱劇之地。將來不識作何稅駕也。正愧未達數行。虔訊孝履。忽承台翰。意氣懇懃。把讀再三。殊增感激。迨跪展太老先生傳銘。盥漱細誦。尤堪革薄起懦。百世猶將賴之。奚止裨一時之世道人心也耶。東望泥首。莫知所頌。肅此奉復。臨池悚切。相去千有餘里。歲華屢更。雖彼此神依。非山川所能間隔。而握晤維艱。無日不惓惓於懷也。接台翰恍如面承。稍慰積懷。弟向以冗病之故。已苦支離。近復多所不堪。更覺頽憊。而不能自解。惟望高賢到署。得奉指南。幸老年翁善自頤養。早命鋒車。無使弟輩久爲引領也。辱委尊簋。弟素不能書。稍遲容覓人代揮。寄去。虔勒附復。臨穎瞻溯。

吳侍郎元萊

一別數年。時深懷想。昨聞旌節入長安。弟以外吏勞勞。匪朝伊夕。覺人事過疎。而功令是凜。遂罪積如山。莫可追也。老先生寅年臺。或亦諒其生平。而不加督責耶。遠承手諭。如對芝眉。復荷渥儀。安敢濫拜。唯心

銘良友之至愛而已。別諭自不敢勞台慮。此弟所藉以安靖地方之賢技也。況叨梓里乎。敬聞命矣。匆匆不及多緒。容面再佈可耳。臨啓依切。

容臺共濟雅賴同心。素旆旌旋。未遑馳送。迄今耿耿。老年臺情纏孺慕。至性過人。不肯深以爲念。頃接手言。得聞孝履。遠懷差慰。太老先生純孝天成。人倫師表。垂諸史冊。照耀千秋。承頒墓表。兼以傳辭。讀之肅然起敬。但天不憖遺。彌增哲人云萎之歎耳。不肖逐隊碌碌。寸長罔效。引退難言。忝竊滋懼。未知年翁何以教我。豚兒僥倖。非台庇不至此。伏蒙垂注。感荷無已。硃卷呈教。郢削幸甚。臨啓瞻馳。

孫侍郎承澤

秋霽可喜。吾鄉之災。貴縣稍輕。家中有人來否。知闔宅納吉也。出署後。乞時過一譚。寧兄事若何。此時或無暇及此也。不盡。澤頓首。

連未得晤爲歉。七日齋中淪茗小譚。乞爲約譚。舟老同過。前評宋大家文。極爲痛快。欲續爲商榷。竚望竚望。

昨校定晦庵先生。極其精細。已一一改正。再以第二冊奉覽。幸卽賜還。理學先生詩。晦庵下惟劉靜脩先生。極工。已選定。繕將完矣。寧有近息否。承澤頓首。

久未奉教。殊切耿耿。近養痾西河水。次草廬。尙約年翁小譚也。爛麵衒衒。有小房一所。頗堪居停。今年欲蓋中層。不與人住。以西向日者言宜明歲。敬借光移居。不必論租。前已面言之矣。不盡。澤頓首。

惟老年翁劬勵在公。今已及瓜。寬大廉淑之譽。浹於遠邇。喜可知也。不肖近來閉門益深。自年翁行後。杳無覓然之音。故懷思倍切。非可言喻。年華日暮。而咿唔之志不衰。諸經俱有註解。現在註儀禮。五六月間。可卒業。苦長安無經學書。承教代爲南中收買。此莫大之愛。謹開一單。乞留神。重價購之。抵都一一奉上。使旋匆迫。肅此代候。願言不盡。

法方伯若真

老年翁報命榮歸。竟不能一尊奉祖道。雖淪落中人。不足齒數。其如中心耿耿何。弟已戒道矣。一札再別。不盡之緒。時縈夢寐。附問候。小奏九件。統希注鑒。其別件載一單。唯老年臺不忍之懷。向吾鄉諸君子一致之。感德何既。肅此代布。不盡依依。原綾一幀。書復。

說帖

原任江南安徽等處承宣布政使司法若真說帖。伏念真待罪兩載。拮据萬狀。盡爲他人作牛馬。若有一分一文。自私自利。天地鬼神鑒誅。今離任之後。代上憲賠墊者。已罄變家產。尙有一二未完。無可再賠。不得不據實說明。仰求郎大人金前司自行歸結。然不將事之原委說明。恐冒欺罔之罪。謹一一陳說。一。郎大人任內。發前司收寄賣黃豆肆萬餘石。至八年回京時。勒令變價解院。復差內丁守取豆價。因年久。內有耗折。並經承侵欺貳千叁百陸拾柒石。該銀壹千壹百捌拾五兩。經承陳睿無力賠補。遍揭通衢。有總督豆商之語。污讎不堪。只得借動庫銀墊解。今庫項無補。無可代賠者。一也。一。郎大人任內。積欠倉米貳

千柒百陸拾餘石。至八年回京時。差內丁賈冊到司。諭令改入新收項下。候發價銀。及至回京。價仍不給。前米缺額。只得借動儲米抵完。又令左書辦取去銀貳千兩。銀米俱空。今儲米部行變價。應完米價銀肆千柒百叁拾玖兩零。虛懸無着。無可代賠者。二也。一金前司任內。陸年柒月內。自領出庫銀壹萬捌千餘兩。至柒年捌月。始買豆壹萬叁千石到省。久泊河干。及詳明奉郎大人憲批收倉。在船內卽有霉爛。共計六千餘石。此時若勒買足報收。有失同官之雅。只得允從。使經承林植領出。易新償補。後林植身故。家貧不能賠補。軍需缺額。後官卽勒令本司代賠。或在金前司良心不昧。不能不急爲措完者也。以上三件。皆遠年未完。並非本司任內之事。本司亦並不會出結受代。今俱累及本司。淹滯江南。諒亦仁人君子所垂憐者。敬陳臺電。如會郎大人金前司。鼎言歸結。俾得生還。存歿啣結。謹說。

趨叩未得晤謝爲懷。前見鄭石兄。道及老年翁思得秦篆。弟有一老友。頗善此技。敬爲製二章呈閱。儻可領略。不妨以所欲者。頻爲示下。亦知此道之有公好也。何如何如。諸容晤布。不盡。制弟眞百稽。

許久未獲晤教。何日共移鄭兄處。得借高談一日耶。爲望爲望。前委大字。倩人勾出。其力不能如腕。聊以竟數耳。敬報命。制弟眞百稽。

許久未晤。正欲受教。昨忽接家報。有傷心之痛。病不能支。實不能侍長者。但肅此代謝。非敢言辭也。謹叩呈。不具。弟眞頓首。

昨趨望大喜。未獲晤叩。容再領教。誨。吉聯博笑。小弟眞頓首。

孤旅遠客到忙忙數晝夜無停時。以食客起居皆身親之。廚下無一使可能了此也。適客去得稍息。信手作數句。媿不能揚揄大雅之十一。其若之何。幸老年翁裁用之。令叔老年臺尙容端肅呈不具。先此特報。並宥遲遲之罪。諸容面悉。不盡制弟百稽。

別老年翁後。卽以謁撫軍。作皖城行。得之郵筒。附忤庭年兄札。恐遲其中之說。先遣使上聞。亦有一札致徐公祖。乃爲弟交盤之役。祈其破格照拂。老年翁見時。當爲弟致謝之。感徐公祖之恩斯勤斯也。並祈老年翁代投之。統容歸去時。登叩不具。制弟百稽首。

錢塘雪旅。把臂言別。儻忽四載。其如此光陰何。弟以不然之白灰。自不入春陽之赤管。老年臺先生。戛戛契刀。軒輶簪珥。而雪中之炭。亦覺艱澀。江河日下。可恠也。亦可悲也。歎息歎息。自弟狼狽歸來。頓臥空山。炎涼萬狀。辛酸百結。欲再走長安。一番買老。仰二天之在層霄。憐一介之有知己。老年臺先生。必有以指我於泥途落落中也。秋暮漸寒。年歲不登。脂車無資。須之來春。可偕長兒。樽同裝北發。趨謁崇階。以近奉截取之例。先具文投貴衙門。祈臺鼎曲玉之。亦以王玉如年兄歸來云。前猶有軍機十八人無著落。後此者更無期。徒多往返耳。且戀戀者。樽兒於己未徵幸後。卽循廣東例。券助援納中行等衙門。本年十月初。卽題冊到戶部。因執事金提塘苛派抖難。至今六年。不給庫收。以致未行。貴衙門近得龍需。老年翁大力轉求。又不能不遲遲以待望梅。俟有頭緒。更望臺恩。先此長鳴。聊申闊緒。統希慈鑒。自愧空函。尙俟晤叩不具。小弟若真百頓。拙書將意有如晤言。以當大矇。弟真再頓首。

李開學之芳

日承枉顧柯陽。得領警欬。殊慰飢渴。第以簿領塵勞。未獲一尋青霞仙奔之勝。良用闕然。山城蕭索。仍攜兩卷畫圖。輕舟翩去。在老年翁。雖爲韻事。使地主將何以爲情哉。清秋漸爽。近社自佳。西湖山水間。有勝緣否。臺旌東邁。當在何時。率裁奉候。所煩大作。及物色諸名人。想荷留神。統祈卽示。幸惟垂鑒。可勝神往。軼掌戎旃。屢逢虛度。爾然疲役。自歎勞生。知愛如老年翁。方當憐惜之不暇。而亦爲此稱觴。世法乎。仰荷殷遙。佩服曷已。承示詩文。典瞻風華。俾弟攘美。感何如之。諸友皆屬名下弟。願見有懷。已非朝夕。希老年翁代爲道意。湖上勝事如常。不無倦游之慨。便中容再致之。別教當俟酌奪。另報。勿次勒復。未盡縷縷。班師北旋。兩省更番駐防。夫役艱繁。十倍于昔。小民竟無休息之期。顧此殘疆。殊增浩歎。頃接翰教。得諗近履。二三執友。半載以來。不能爲湖山游屐增色。且人情奔驚。久已悉其槩矣。承諭當爲留意。必須來謁。而後酌定也。林生抵衢。自是端謹之士。餘具悉之。率復幸鑒。不盡。前承翰教。勿次附復。應塵典記。班師就道。比日近況何似。二三湖山主人。不致寂寂否。甚爲念之。前書所云林生。恐江干舟楫維艱。今特專人奉迓。煩老年翁轉致。幸卽遄發。日有碑版文字數首。欲藉面商。久已懸榻待之矣。淳安留代。已卽批行。率此惟鑒。不盡。

余閣學國柱

貴役旋後。又有兩函。未知何時可到。造船之說。既在外定何衙門。此爲可以自主。但恐船增一事。而別累

不減。須得督疏兩分。題明就裏。如議自易易也。白仲調年兄。以海內名宿。得屬淵源。大爲吾道生色。迺以衆見參差。未得首用。不獨我輩悵快。凡屬有心。莫不歎惜。頃因別有端倪。未便遽歸。其令郎家居。恐有應照拂者。在台兄至性關切。自毋事不佞豐干耳。藉寄不盡。

客春小力南還。接手書。殊慰遠念。不佞沿途阻風雨。仲春始得從廣陵登車以北。過家兄滁陽署。知台丈有龍江之命。冀得中道便晤。茲因敝故友王雲川。諱子龍。藉候起居。敝友於先朝爲甯南虎將。臥龍岡乃其故里。滄桑後。泛宅投綸。與不佞結鄰好。廿餘年。而食貧特甚。此君重意氣。輕死生。然不曉筆墨。不解逢迎。台丈當另設一等待之耳。途次如面。弗旣。

京國聚首。凡事正可商量。不謂不孝。自孽深重。遽抱大痛。飲血南歸。遂易星霜。緣抵家之後。親友弔問。遠近陸續。今夏始畢。且敝邑又僻處山谷。無從一寄問問。門下雅才練識。自是遠到之器。但輦轂之地。是非易淆。物力維艱。慎交游。惜日費。此其最要耳。不孝志氣益敗。清華絕想。邇爲先人無歸窆之善地。早夜疚心。意欲稍遲起復。以襄此大事。未卜可如願否。端此聊當面晤。長安風景若何。有以示我。臨楮依依。不盡。聞命之始。原擬中途可晤。不謂馳驅相左。又承存注。至今爲念。不佞於三月廿四入都。此月即可推補。銓部雖有復例之議。然局面闊大。頭緒繁雜。終成道謀。貴差較之別推。雖有豐儉之殊。安穩無虞。則勝他處。六七八三月。方是良時。但滿公極宜調和。大約凡事寬一步。讓一着。終得便宜耳。分造漕船之說。卽與司農商之。如有的着。另當遣報。王雲川之札。原非得已。高明必能體亮。目下家叔又索有一函奉候。亦不得。

不應輕重亦在台酌。實屬親叔。自不得與王雲川同眎也。同門卷已見。孫白張萬四兄亦已相晤。借光夥矣。役旋匆匆率復不及百一。役還帶有寸復。想久入台照。造船之舉已行外議。但得在外酌定之後。方從內料理。庶有濟也。家胞叔諱允明。以從家兄滁陽署。便候台範。亦通家之誼。不可已者。昨已從別函諄切及之。台丈古道人。定不待不佞之長言矣。率奏如面。弗既。

杜別駕恆燦

周京舊地。文獻尙存。得老世丈輒跡及之。王風大雅。倡道同人。真一時之盛。駸駸可千秋者也。承教大作。洋洋多風。得初盛遺音。且楷法精妙。當奉爲奕世之珍矣。瘦杯荷愛。莊生謂不材得全。弟知懼矣。并敬謝教益也。何日命駕牛頭寺爲十日談。弟掃徑以俟矣。復顏世兄同胞。三原道弟。杜恆燦頓首。司左側一小樓頗潔。非酒家也。弟已攜尊卷在此踟躕。不敢遠勞至北門矣。昨書如抄。竟付小力也。弟燦再言。

竟日論文。又得縱觀奧府。會城中如此清爽宜人。之事未曾有也。太上感應經。乃弟從春月刻成者。以紙墨之資。尙須將伯。遂不獲盛爲傳布。謹奉一部。爲旅舍寓目。未審可呈覽於先生長者之前。命工印施乎。刻板見在省中印工處矣。西果二種。并志寸心。榮發何日。今日尙過我耶。不一。弟燦頓首。手教至。諷誦再四。輒不勝情。弟土木形骸久矣。不意吾兄之能感人。一至此耶。東發何日。慎重加餐。努力。